


中武9
176
24



門中武
孫 176
卷 24



孫真人千金方衍義卷十八

長洲張 璐路玉著

南沙席世臣郢客校

大腸腑方 凡七類

大腸腑脈論第一

論曰大腸腑者主肺也鼻柱中央是其候也肺合氣於大腸大腸者為行道傳瀉之腑也號監倉掾重一斤十二兩長一丈二尺廣六寸當臍右回疊積還反十二曲貯水穀一斗二升主十二時定血脈和利精神千金明堂外臺同難經云長二丈一尺大四寸神徑一寸之少半十六曲盛穀一斗水七升半鼻

遂以長以候大腸

右手關前寸口陽絕者無大腸脈也若少氣心下有水氣立秋節卽欬刺手太陽治陰在魚際間

右手關前寸口陽實者大腸實也若腸中切痛如鍼刀所刺無休息時刺手陽明治陽在手腕中瀉之

大腸病者腸中切痛而鳴濯濯冬日重感於寒則泄當臍而痛不能久立與胃同候取巨虛上廉

腸中雷鳴氣上衝胸喘不能久立邪在大腸刺盲之原巨虛上廉三里

大腸脹者腸鳴而痛寒則泄食不化

大腸有寒鶩溏有熱便腸垢

大腸有宿食寒慄發熱有時如瘧狀

肺前受病移於大腸肺欬不已欬則遺失便利厥氣客於大腸則夢田野

肺應皮皮厚者大腸厚皮薄者大腸薄皮緩腹裏大者大腸緩而長皮急者大腸急而短皮滑者大腸直皮肉不相離者大腸結

扁鵲曰手太陰與陽明爲表裏大腸若病實則傷熱熱則脹滿不通口爲生瘡食下入腸腸實而胃虛食下胃胃實而腸虛所以實而不滿乍實乍虛乍來乍

去虛則傷寒寒則腸中雷鳴泄青白之利而發於
氣水根在大腸方見治水篇中大腸絕不治何以知之泄利
無度利絕則死

手陽明之脈起於大指次指之端循指外側上廉出
合谷兩骨之間上入兩筋之中循臂上廉上入肘外
廉循臑外前廉上肩出髃骨之前廉上出柱骨之會
上下入缺盆絡肺下膈屬大腸其支者從缺盆直上
上頸貫頰入下齒縫中還出俠口交人中左之右右
之左上俠鼻孔是動則病齒痛頸腫是主津所生病
者目黃口乾鼽衄喉痺肩前臑痛大指次指痛不用

氣盛有餘則當脈所過者熱腫虛則寒慄不復盛者
則人迎大三倍於寸口虛者則人迎反小於寸口

大腸虛實第二脈二首 方二首 灸法七首

大腸實熱

右手寸口氣口以前脈陽實者手陽明經也病苦腸
滿善喘欬面赤身熱喉咽中如核狀名曰大腸實熱
也

生薑泄腸湯 治大腸實熱腹脹不通口為生瘡
者方

生薑

橘皮

青竹茹

白朮

黃芩

梔子仁

各三兩

桂心 一兩

茯苓

芫硝

各二兩

地黃 十兩

大棗 十四枚

右十一味咬咀以水七升煮取三升去滓下芫硝分二服

衍義

本經言生薑久服去臭氣通神明故千金以之泄大腸之實熱兼大棗以治心腹邪氣安中養脾平胃氣通九竅橘皮下氣通神竹茹黃芩梔子清上熱口瘡地黃芫硝治傷中逐血痺除邪熱通脹閉共襄推陳致新之功白朮茯苓保守中氣以助諸

藥之力桂心為祛熱之內應也

治腸中臏脹不消方

灸大腸腧四十九壯

大腸有熱腸鳴腹滿俠臍痛食不化喘不能久立巨虛上廉主之

大腸虛冷

右手寸口氣口以前脈陽虛者手陽明經也病苦胸中喘腸鳴虛渴唇乾目急善驚泄白名曰大腸虛冷也

黃連補腸湯 治大腸虛冷利下青白腸中雷鳴

相逐方

黃連 四兩

茯苓

芎藭 各三兩

地榆 五兩

酸石榴皮 五片

伏龍肝 雞子大一枚

右六味以水七升煮取二升半去滓下伏龍肝末分三服

義衍

方下雖言大腸虛冷痢下青白然腸中雷鳴火激痰動與生薑瀉心湯之用芩連佐乾生二薑同意此用黃連佐檣皮伏龍肝得寒熱相參之妙檣皮酸澀茯苓利之芎藭地榆佐檣皮以理血脫方下雖不治血而治血之義具見言外矣

治腸中雷鳴相逐痢下方

灸承滿五十壯穴在俠巨闕相去五寸巨闕在

命曰心下一寸 灸之者俠巨闕兩邊各二寸半

治腸中常鳴時上衝心方

灸臍中

食飲不下腹中雷鳴大便不節小便赤黃陽綱主之腹脹腸鳴氣上衝胸不能久立腹中痛濯濯冬日重感於寒則泄當臍而痛腸胃間遊氣切痛食不化不嗜食身腫俠臍急天樞主之腸鳴而痛溫留主之

肛門論第三 論一首

論曰肛門者主大行道肺大腸候也號為通事令史重十二兩長一尺二寸廣二寸三分應十二時若臟傷熱則肛門閉塞大行不通或腫縮入生瘡若腑傷寒則肛門開大行洞泄肛門凸出良久乃入熱則通之寒則補之虛實和平依經調理 方見二十四卷中

皮虛實第四 論一首 方二首

論曰夫五臟六腑者內應骨髓外合皮毛膚肉若病從外生則皮毛膚肉關格強急若病從內發則骨髓疼痛然陰陽表裏內隨外皮其病源不可不詳之也

皮虛者寒皮實者熱凡皮虛實之應主於肺大腸其病發於皮毛熱則應臟寒則應腑

蒟藿蒸湯 治皮虛主大腸病寒氣關格方

蒟藿根葉 切三升 菖蒲葉 切二升 桃葉皮枝 二升

細糠 一斗 秣米 五升

右五味以水一石五斗煮取米熟為度大盆器貯於盆上作一小竹牀子罩盆人身坐牀中周回四面將薦薦障風身上以衣被蓋覆若欲氣息時開孔對中洩氣取通身接汗可得兩食久許如此三日蒸還溫藥足汗用之若盆裏不過熱盆下安炭

火非但治寒但是皮膚一切勞冷悉治之

衍義 蒴藿治寒痺拘急菖蒲通利九竅桃葉辟邪散血
糠米蒸發肉腠共襄作汗之功也

梔子煎 治皮實主肺病熱氣方

梔子仁 枳實 大青

杏仁 柴胡 苾硝各二兩

生地黄 淡竹葉切各一升 生元參五兩

石膏八兩

右十味以水九升煮取三升去滓下苾硝分三服

衍義 肺主皮毛肺熱則皮實故用梔子杏仁柴胡元參

竹葉治外熱石膏苾硝大青地黄枳實治內實

欬嗽第五 論二首 方五十五首 灸法十四首

論曰經云五臟六腑皆合欬肺居外而近上合於皮
毛皮毛喜受邪故肺獨易為欬也邪客於肺則寒熱
上氣喘汗出欬動肩背喉鳴甚則唾血肺欬經久不
已傳入大腸其狀欬則遺糞腎欬者其狀引腰背痛
甚則欬涎腎欬經久不已傳入膀胱其狀欬則遺尿
肝欬者其狀左脇痛甚者不得轉側肝欬經久不已
傳入膽其狀欬則清苦汁出心欬者其狀引心痛喉
中介介如梗甚者喉痺咽腫心欬經久不已傳入小

腸其狀欬則失氣脾欬者其狀右脇痛陰陰引肩背甚者不得動動則欬劇經久不已傳入胃其狀欬而嘔嘔甚則長蟲出久欬不已三焦受之三焦欬狀欬而腹滿不能飲食此皆聚於胃關於肺使人多涕唾而面浮腫氣逆也若順時有風寒冷人觸冒解脫傷皮毛間入腑臟爲欬上氣如此也有非時忽然暴寒傷皮膚中與肺合則欬嗽上氣或胸脇支痛欬唾有血者是其熱得非時之寒暴薄之不得漸散伏結深喜肺癰也因欬服溫藥欬尤劇及壯熱吐膿血汗出惡寒是也天有非時寒者急看四時方也問曰欬病有十何謂也師曰有風欬有寒欬有肢欬有肝欬有心欬有脾欬有肺欬有腎欬有膽欬有厥陰欬問曰十欬之證以何爲異師曰欲語因欬言不得竟謂之風欬飲冷食寒因之而欬謂之寒欬心下堅滿欬則肢痛其脈反遲謂之肢欬欬則引脇下痛謂之肝欬欬而唾血引手少陰謂之心欬欬而涎出續續不止引小腹謂之脾欬欬引頸項而唾涎沫謂之肺欬欬則耳無所聞引腰并臍中謂之腎欬欬而引頭痛口苦謂之膽欬欬而引舌本謂之厥陰欬風欬者不下之寒欬肢欬肝欬刺足太衝心欬刺手神門脾欬刺

足太白肺欬刺手太泉腎欬刺足太谿膽欬刺足陽
陵泉厥陰欬刺手太陵

夫久欬為痲欬而時發熱脈在九菽一作者非虛也

此為胸中寒實所致也當吐之

夫欬家其脈弦欲行吐藥當相人強弱而無熱乃可

吐耳欬家其人脈弦為有水可與十棗湯下之見下第十

二不能臥出者陰不受邪故也留飲欬者其人欬不

得臥引項上痛欬者如小兒掣縱狀夫酒家欬者必

致吐血此坐久極飲過度所致也其脈沉者不可發

汗久欬數歲其脈弱者可治實大數者死其脈虛者

必善冒其人本有支飲在胸中故也治屬飲家上氣

汗出而欬屬飲家欬而小便利若失溺不可發汗汗

出即厥逆冷

夫病吐血喘欬上氣其脈數有熱不得臥者死寒家

欬而上氣其脈數者死謂其人形損故也脈大而散

散者為氣實而血虛名曰有表無裏上氣面肘腫肩

息其脈浮大不治加痢尤甚上氣躁而喘者屬肺脹

欲作風水發汗愈

小青龍湯 治欬逆倚息不得臥方見第九卷傷寒上

小青龍湯下已多唾口燥寸脈沈尺脈微手足厥

逆氣從小腹上衝胸咽手足痺其面翕熱如醉
狀因復下流陰股小便難時復冒者與桂苓五
味甘艸湯治其氣衝方

茯苓

四兩

桂心

甘艸

各二兩

五味子

半升

右四味咬咀以水八升煮取三升去滓温分三服
衝氣即低而反更欬胸滿者苓甘五味薑辛湯以
治其欬滿方

茯苓

四兩

甘艸

乾薑

細辛

各三兩

五味子

半升

右五味咬咀以水八升煮取三升去滓温服半升

日三

欬滿即止而更復渴衝氣復發者以細辛乾薑為
熱藥也服之當遂渴而渴反止者為支飲也支
飲法當冒冒者必嘔嘔者復內半夏以去其水

桂苓五味甘艸去桂加薑辛半夏湯方

半夏

五味子

各半升

茯苓

四兩

細辛

乾薑

甘艸

各二兩

右六味咬咀以水八升煮取三升去滓温服半升

日三

水去嘔止其人形腫者應內麻黃以其人遂痺故
不內麻黃內杏仁名苓甘五味加薑辛半夏杏
仁湯方

杏仁

半夏

五味子

各半升

茯苓

四兩

細辛

乾薑

甘草

各三兩

右七味咬咀以水一斗煮取三升去滓溫服半升
日三若逆而內麻黃其人必厥所以然者以其人
血虛麻黃發其陽故也

若面熱如醉此為胃熱上衝熏其面加大黃劑之

苓甘五味加薑辛半夏大黃湯方

大黃

細辛

乾薑

甘草

各三兩

茯苓

四兩

杏仁

半夏

五味子

各半升

右八味咬咀以水一斗煮取三升去滓溫服半升
日三

衍義

小青龍湯余於傷寒門中大青龍條下具言之矣
而金匱治欬敘於痰飲之下趙以德衍義論之最
詳以欬必因之痰飲而五飲之中獨膈上支飲最
為欬嗽根蒂外邪入而合之因欬即無外邪而支

飲漬入肺中自足令人欬嗽不已況支飲久蓄膈上其下焦之氣逆衝而上尤易上下合邪也夫以支飲之故而令外邪可內下邪可上不去支飲則欬終無寧字矣其曰欬逆倚息不得臥小青龍湯主之明外內合邪之證惟小青龍湯爲的對耳然用小青龍湯其中頗有精義須防衝氣自下而上重增濁亂其欬不能堪矣傷寒用小青龍湯無少陰證者可服雜證用小青龍湯亦恐少陰腎氣素虛衝任之火易於逆上衝任火上無欬且增煩欬況久欬不已顧可動其衝氣耶蓋衝任二脈與腎

絡同出胞中腎虛不能固守於下二脈相挾從小腹逆衝而上也腎氣本虛之人卽素無痰飲纔感外邪則衝任之火便乘勢上填膈上迫脅津液而爲痰飲支塞清道必致欬逆倚息不得臥也倚息本倚伏而喘息陰火內應外邪爲證最急不得不以小青龍湯爲務祇緣真元素虧總有合劑不能逞迅掃之力所以餘邪得以久持致有如下變證也 多唾飲上溢也口燥津液傷也寸脈沉尺脈微手足逆冷衛中陽氣耗也氣從小腹上衝胸咽陰火逆也手足痺榮血虛也其面翕熱如醉陽明

胃熱也因復下流陰股小便難陰火下流膀胱也
時復冒太陽餘邪未散也然證雖屬變皆衝氣逆
上之故且有時復昏冒一證卽定太陽表證確守
冒家汗出自愈之例故反覆出入不離小青龍湯
加減也設證多端衝氣最爲叵測所以首變茯苓
桂心五味甘艸湯先治衝氣衝氣卽低而反更欬
胸滿水在膈間不散也再變前方加乾薑細辛以
治其欬滿欬滿卽止 第三變而更復渴衝氣復
發以細辛乾薑爲熱藥也服之當遂渴而渴反止
者爲支飲也支飲者法當冒冒者必嘔嘔者復內

半夏以去其水水去嘔止 第四變其人形腫者
以水尚在表也加杏仁主之其證應內麻黃以其
人遂痺故不內之若逆而內之必厥所以然者以
其人血虛麻黃發其陽故也 第五變若面熱如
醉此爲胃熱上衝熏其面加大黃以利之 前四
變隨證加減施治猶未離本來繩墨至第五變其
證頗似戴陽而能獨斷陽明胃熱乃加大黃以利
之按陽明病面合赤色不可攻之爲其腎虛陽氣
不藏故以攻爲戒而此平昔陰虧血虛反用大黃
利之者以其證變疊見雖有面熱如醉而脈見寸

沉尺微洵非表邪怫鬱而為胃中熱蘊無疑竟行
滌飲攻熱不以陰虛為慮而致扼腕也嗟夫仲景
治欬全不從欬起見治其支飲下其逆氣衝氣法
中之法遊刃有餘千金祖述其義以為支飲欬逆
之成則

欬而上氣肺脹其脈浮心下有水氣脇下痛引缺
盆設若有熱者必躁其人常倚伏小青龍加石
膏湯主之方

石膏

乾薑

桂心

細辛

各二兩

麻黃

四兩

芍藥

甘草

各三兩

半夏

半升

五味子

一升

右九味咬咀以水一斗先煮麻黃減二升去沫下
藥煮取二升半強者服一升羸者減之小兒服四
合仲景治肺脹欬而上氣煩燥而喘脈浮者心下有水外臺同

衍義

小青龍湯原為欬逆倚息不得臥之首推今因心
下有水氣而脈浮頗有似乎風水之候但彼因身
腫自汗不渴知病在表故用越婢此因肺脹喘滿
痛引缺盆知病在裏故用小青龍加石膏仍不出
越婢法

射干麻黃湯

治欬而上氣喉中如水雞聲者方

射干

細辛

欵冬花

紫苑各三兩

麻黃

生薑各四兩

半夏

五味子各一升

大棗七枚

右九味咬咀以東流水一斗二升先煮麻黃去上沫內藥煮取三升去滓分三服日三

衍義

上氣而作水雞聲乃是痰礙其氣氣觸其痰風寒入肺之一驗故於小青龍方中除桂心之熱芍藥之收甘艸之緩而加射干紫苑欵冬大棗專以麻黃細辛發表射干五味下氣欵冬紫苑潤燥半夏生薑開痰四法萃於一方分解其邪大棗運行脾

津以和藥性也

厚朴麻黃湯 治欵逆上氣胸滿喉中不利如水

雞聲其脈浮者方

厚朴五兩

麻黃四兩

石膏

細辛

乾薑各二兩

小麥一升

杏仁

半夏

五味子各半升

右九味咬咀以水一斗二升先煮麥熟去麥內藥煮三升去滓分三服日三

衍義

欵而脈浮者外邪居多法當發散為主故於小青龍湯中除去桂枝湯三味加入厚朴以下氣石膏

以清熱小麥引入胃中助其升發之氣也

澤漆湯 治上氣而脈沉者方

澤漆 三斤細切以東流水五斗 半夏 半升

生薑 煮取一斗五升去滓澄清 紫苑 一作紫參 白前 各五兩

黃芩 甘艸 桂心

人參 各三兩

右九味內澤漆汁中煮取五升每服五合日三夜

衍義

欬而脈沉邪在營分熱過於營吸而不出其血必結邪氣外裹故用澤漆破血為君加以生薑半夏

之開痰紫苑白前之下氣黃芩之清熱桂心之和營人參甘艸匡助胃氣以行藥力俾壘一空元氣不損製方之妙若此得不以之為法耶

麥門冬湯 下氣止逆治火逆上氣咽喉不利方

麥門冬汁 三升 半夏 一升 粳米 三合

人參 各二兩 甘艸 各二兩 大棗 二十枚

右六味以水一斗二升煮取六升去滓分四服日

三夜一

衍義

此胃中津液乾枯虛火上炎之候凡肺氣有胃氣則生無胃氣則死胃氣者肺之母氣也故於竹葉

石膏湯中偏除方名二味而加麥門冬數倍為君
人參甘艸粳米以滋肺母使水穀之精微皆得上
注於肺自然沃澤無虞當知火逆上氣皆是胃中
痰氣不清上溢肺隧占據津液流行之道而然是
以倍用半夏更加大棗通津滌飲為先奧義全在
乎此若濁飲不除津液不致雖日用潤肺生津之
劑烏能建止逆下氣之勳哉俗以半夏性燥不用
殊失立方之旨

麻黃石膏湯 治上氣胸滿方

麻黃 四兩

石膏 如雞子大

厚朴 五兩

小麥 一升

杏仁 半升

右五味以水一斗先煮小麥熟去麥下藥煮取三
升去滓分三服 深師用此治久逆上氣喉中如水
雞鳴欬者加半夏五味子各半升

乾薑
三釁

衍義此於麻杏甘石湯中除去甘艸之緩中易入厚朴
以泄滿小麥以助肺胃而資少陽生發之氣以其
得春升之氣最先也

十棗湯 夫有支飲家欬煩胸中痛者不卒死至
一百日一歲可與此方

大棗 十枚

大戟

甘遂

芫花 等分

右大戟甘遂芫花搗為末以水一升五合煮棗取八合去滓內藥末強者一錢七羸者半七頓服平旦服而不下者平旦更加半匕下後自然補養

〔衍義〕十棗湯方在傷寒門中治表解裏未和痞滿脇痛在金匱中治懸飲內痛千金取治支飲欬煩胸中久痛總取峻攻痰積以破宿積

欬而引脇下痛亦十棗湯主之

溫脾湯 治食飢而欬者方

甘艸 四兩 大棗 二十枚

右二味咬咀以水五升煮取二升分三服若咽中痛而聲鳴者加乾薑一兩

〔衍義〕肺胃虛寒則欬故用甘艸溫散臟腑寒熱邪氣大棗安中養脾共建溫脾之功世本方下註治食飽而欬豈有食飽胃實而欬反用甘艸大棗二味實之之理敢力正之

百部根湯 治嗽不得臥兩眼突出方

百部根 生薑 各一斤 細辛

甘艸 各三兩 貝母 白朮

五味子 各三兩 桂心 四兩 麻黃 六兩

右九味咬咀以水一斗二升煮取三升去滓分三

服古今錄驗有杏仁四兩紫苑三兩

衍義

嗽不得臥兩眼突出明是寒鬱熱邪為患故首取

百部之溫散肺氣麻桂薑辛之開發肺邪貝母助

百部消寒木甘助麻桂透表五味收麻辛之散也

海藻湯 治欬而下利胸中痞而短氣心中時悸

四肢不欲動手足煩不欲食肩背痛時惡寒方

海藻 四兩

半夏

五味子

各半升

生薑 一兩

細辛 二兩

茯苓 六兩

杏仁 五十枚

右七味咬咀以水一斗煮取三升去滓分三服日

三 一方無五味子生薑

衍義

欬而下利水飲溢於肺胃滲於大腸而見痞逆短

氣心中時悸者心火惡水之象也四肢不欲動不

欲食者脾氣傷也背痛惡寒者陽氣失職不能榮

於陽位也故用海藻之鹹順而泄留飲水氣杏仁

下氣泄滯苓半辛薑滌除痰垢五味收斂肺氣也

白前湯 治水欬逆上氣身體浮腫短氣脹滿晝

夜倚壁不得臥咽中作水雞鳴方

白前

紫苑

半夏

大戟 各二兩

右四味咬咀以水一斗浸一宿明日煮取三升分
為三服

衍義

欬逆上氣而見肢體浮腫作水雞聲乃水飲溢於
肺胃流入百骸故用白前以疏肺氣紫苑以散血
氣半夏以滌痰氣大戟以利水氣皆從金匱澤漆
湯中採出大戟之利水與澤漆不殊
治九種氣嗽欲死百病方

乾薑

半夏

細辛

紫苑

蕤花 一作芫花

吳茱萸

茯苓

甘艸

甘遂

防葵

人參

烏頭

大黃

杏仁 各五分

葶藶 二分

巴豆

厚朴

白薇 各三分

遠志

菖蒲

五味子

前胡

枳實

蜀椒

皂莢

當歸

大戟

桂心 各半分

右二十八味為末蜜丸如梧子大先食服二九日
二服以知為度不知增之

衍義

氣嗽而兼九種百病之治故彙採寒熱補瀉氣血痰水及乎峻攻之味無一不具苟非龐雜之方亦無以療龐雜之病

麻黃散 治上氣嗽方

麻黃 半斤

杏仁 百枚

甘艸 三兩

桂心 一兩

右四味治下篩別研杏仁如脂內藥末和合氣上時服一方寸匕食久氣未下更服一方寸匕可至三七氣發便服即止 一方去桂心甘艸

衍義

上氣而嗽非開泄肺氣無以逞止逆之功故取傷

寒麻黃湯溫散胸中之邪不必更加一味紊亂先聖成則

蜀椒丸 治上氣欬嗽太醫令王叔和所撰御服甚良方

蜀椒 五分

烏頭

杏仁

石菖蒲

礬石

一云礬石

皂莢

各一分

欬冬花

細辛

紫苑

乾薑 各三分

麻黃

吳茱萸

各四分

右十二味為末蜜丸如梧子大暮臥吞二丸治二十年久嗽不過二十九

衍義

辛温破結之劑彙集一方以治積年冷氣頑痰可謂峻矣更需礪石之專攻腹中堅癖皂莢之去風拔毒通關利竅何憚二十年久嗽不能克應乎通氣丸 治久上氣欬嗽咽中腥臭虛氣覺心痛眼疼耳中嘈嘈風邪毒疰時氣食不生飢肉胸中隔塞嘔逆多唾惡心心下堅滿飲多食少惡疰淋痛病方

蜀椒 二升

飴糖 三升

杏仁

天門冬

乾薑

人參

烏頭 七分

桂心 六分

大附子

各四分
五枚

蜈蚣

五節

右十味為末別治杏仁如脂稍稍內藥末搗干杵焯飴乃內藥末中令調和含如半棗一枚日六七日三四服以胸中温為度若夢與鬼交通及飲食者全用蜈蚣食不消加杏仁五合小腹急腰痛加天門冬杜仲有風加烏頭三枚附子一枚立夏後勿加也有停飲加葶藶三兩

衍義

金匱大建中湯專取蜀椒下氣止逆乾薑温中破積人參補正除邪膠飴潤肺止嗽以治胸腹寒積出見有頭足上下痛不可觸千金加烏附桂心以

攻毒破結杏仁泄肺散滿蜈蚣截風解毒天門冬
除欬逆寒熱并化烏附椒薑之燥烈也

治欬逆上氣方

蜀椒

桂心

海蛤各四分

昆布

海藻

乾薑

細辛各六分

麥門冬十分

右八味為末蜜丸如梧子大飲服十九加至二十
丸日三服有人風虛中冷胸中滿上氣喉中如吹
管聲吸吸氣上欲欬服此方得瘥

衍義

欬逆日久不除必是寒痰膠積之故故用椒桂薑

辛以蒐肺絡之寒邪海蛤昆藻以破肺竅之痰氣
用門冬者不特治欬并滋方中辛燥諸味詳喉中
如吹管聲豈非病在肺竅之明驗乎

治欬嗽胸脇支滿多唾上氣方

礬石一作礬石

烏頭一方不用

菖蒲各一分

細辛

黃環各二分

杏仁

欬冬花

紫苑各三分

吳茱萸四分

乾薑五分

蜀椒五分

右十二味為末蜜丸如梧子大每服一九著牙上
嚥汁日五六服劇者常含不止

又方

薑汁一升半

砂糖五合

右二味煎薑汁減半內糖更煎服之

又方

白糖五分

皂莢末一方寸七

右二味先微暖糖令消內皂莢末合和相得丸如

小豆先食服三丸

又方

酒一升半浸肥皂莢兩挺經宿煮取半升分三

服七日忌如藥法若吐多以酢飯三四口止之

又方

巴豆炮去皮勿傷破肉白飲吞下初日二枚二

日三枚

又方

服芥子七丸以油酒下之

衍義

欬逆胸脇支滿濁痰委積清道也上氣多唾寒飲

溢於膈上也方中舉石治堅癖邪氣烏頭散風寒

濕痺心腹冷痛菖蒲細辛溫利九竅黃環治欬逆

寒熱杏仁欬冬紫苑並主欬逆上氣乾薑蜀椒茶

萸並泄胸中逆滿以溫欬逆多唾也 又方薑汁

辛散温肺砂糖甘緩和脾火衰痰清者為宜 又
方皂莢滌除痰垢飴糖緩其暴烈 又方酒浸肥
皂取吐較飴丸者尤甚 又方以巴豆炮黑勿破
碎服者恐其毒烈傷犯喉吻也此惟冷積年久嗽
不止者宜之 又方服芥子入肺搜痰即控涎丹
之意

射干煎 治欬嗽上氣方

生射干

欬冬花 各二兩

紫苑

細辛

桑白皮

附子

甘草 各半兩

白蜜

竹瀝

生薑汁

各一升一云
乾薑五兩

飴糖 三兩

右十一味先以射干內白蜜竹瀝中煮五六沸去
之咬咀六物以水一升合浸一宿煎七上七下去
滓乃合飴糖薑汁煎如餹服如酸棗一丸日三劇
者夜二不止加之以止為度

衍義欬嗽上氣有腎寒肺熱之分此治腎虛火乘於肺
故用附子攝腎歸源細辛下通腎氣射干上散肺
結欬冬花紫苑滋燥潤肺薑汁開發桑皮竹瀝之
性流動膠飴白蜜之滯也

杏仁煎 治冷嗽上氣鼻中不利方

杏仁 五合

五味子

欵冬花 各三合

紫苑

乾薑 各二兩

桂心 三兩

甘艸 四兩

麻黃 一斤

右八味以水一斗煮麻黃取四升治諸藥爲末又內膠飴半斤白蜜一斤合內汁中攪令相得煎如飴先食服如半棗許日三服不知者加之以知爲度

衍義

肺氣通於鼻肺爲客邪所遏以故鼻息不通喘嗽痰清非麻黃湯不能開發肺氣加乾薑以溫腎氣欵冬紫苑以溫肺經五味以收麻杏之散耳

又方 治忽暴嗽失聲語不出方

杏仁

薑汁

砂糖

蜜 各一升

紫苑

五味子 各三兩

通艸

貝母 各四兩

桑皮 五兩

右九味咬咀以水九升煮取三升去滓內杏仁脂薑汁蜜糖和攪微火煎取四升初服三合日再夜一後稍加之

衍義

肺爲諸氣之門戶暴嗽失音必有寒飲阻積肺絡故用杏仁疎洩肺滿通艸通達肺氣薑汁開通經絡桑皮瀉肺之熱五味收肺之津得薑汁之辛散

杏仁之開泄可無斂閉邪風之患紫苑通肺經之血貝母消肺鬱之痰沙糖理胃中之滯蜂蜜滋膈上之燥也

通聲膏方

五味子

欵冬花

通艸 各三兩

人參

青竹皮

細辛

桂心

菖蒲 各二兩

杏仁

薑汁 各一升

白蜜 二升

棗膏 三升

酥 五升

右十三味咬咀以水五升微火煎三上三下去滓

內薑汁棗膏酥蜜煎令調和酒服棗大二枚

衍義

肺臟方中酥蜜膏專滋肺胃之燥以化其氣此方專滋脾肺之津以通其聲方中五味人參滋肺之氣欵冬竹茹清肺之燥桂心細辛搜肺之邪通艸菖蒲利肺之竅杏仁酥蜜薑汁棗膏滋培津氣而通其聲大腸主津故以此方隸之此門

杏仁飲子 治暴熱嗽方

杏仁 四十枚

紫蘇子 一升

橘皮 一兩

柴胡 四兩

右四味咬咀以水一斗煮取三升分三服

衍義嗽起於暴是實非虛杏仁蘇子橘皮皆泄肺之品
柴胡散寒熱之邪

蘇子煎 治上氣咳嗽方

蘇子

杏仁

生薑汁

地黃汁

白蜜 各二升

右五味搗蘇子以薑汁地黃汁澆之以絹絞取汁
更搗以汁澆又絞令味盡去滓熬杏仁令黃黑治
如脂又以向汁澆之絹絞往來六七度令味盡去
滓內蜜合和置銅器中於湯上煎之令如飴每服
方寸七日三夜一 崔氏無地黃汁

又方

乾薑末

五兩

膠飴 一斤

右二味和令調蒸五升米下冷以棗大含化稍稍
咽之日五夜二

衍義

欬嗽日久而客邪未除蘊化為熱故用薑汁散邪

地黃滋熱且製入蘇子順氣味中更以杏仁熬黑
如大陷胸丸中法專滌胸中宿垢內蜜熬煎如飴
緩行搜逐而無驟傷中氣之患如或病人肥盛素
多痰濕者宜從崔氏去地黃例 又方單用乾薑
之辛散肺胃之寒膠飴緩其辛燥頻令嚙化與上

方藥品雖變而功則一揆

芫花煎 治新久嗽方

芫花

乾薑 各二兩

白蜜 二升

右二味為末內蜜中令相和微火煎令如糜每服如棗核大一枚日三夜一以知為度欲利者多服

深師以治冷飲嗽又治三十年久嗽者以水五升煮芫花取三升去滓內薑加蜜合煎如糜服之

衍義

以芫花走而不守之味製入乾薑守而不走味中使邪氣去而正氣守內入蜜中以和走守之性

欬冬煎 治同前

欬冬花

乾薑

紫苑 各三兩

五味子

二兩

芫花

一兩 熬令赤

右五味咬咀以水一斗煮三味取三升半去滓內

芫花乾薑末加蜜三升合投湯中令調於銅器中

微火煎令如飴每服半棗許日三

衍義

於芫花煎中加欬冬紫苑以緩芫花乾薑之烈五味以收耗散之津藥品雖倍而功反稍遜於前

治三十年欬嗽或喘或欬欬雖不同悉主之方

細辛

欬冬花

防風

紫苑

各三兩

藜蘆

二兩

蜀椒

五合

右六味咬咀取藜蘆先著銅器中次紫苑次細辛

次欵冬次椒以大棗百枚間著諸藥間以水一斗
三升微火煮令汁盡出棗曝令燥雞鳴時服半棗
不知明旦服一枚以胸中溫溫為度若強人欲嗽
吐者可小增服之便吐膿囊裏結吐後勿令飲食
欵愈止藥藥勢靜乃食不爾令人吐不已

義衍方中細辛欵冬防風紫苑蜀椒等味助藜蘆湧吐
之性製入大棗之中蒐逐腸胃積垢峻藥緩攻之
妙用無以逾之

治三十年久嗽方

百部根二十斤搗取汁煎如飴服一方寸七日

三服

外臺和錫一斤熬成煎以溫粥飲調下深
師方以白蜜二斤更煎五六沸服二合

義衍久嗽諸藥不應寸白蟲生肺中故用百部專力殺
蟲匹馬單刀不假他味佐使外臺之飴深師之蜜
不過借甘溫之味引入蟲口近世師家治久嗽方
不問有蟲無蟲槩用此味每致苦寒傷伐胃氣而
致天札者不少是豈先哲立方之過歟

又方

紫苑 二兩

欵冬花 三兩

義衍右二味治下篩先食飲服方寸七日三服七日瘥
此方無問暴嗽久嗽虛嗽實嗽有痰無痰有血無

血俱無妨礙但客邪勢甚者無益於治也
又方

白蜜 一斤

生薑 二斤
取汁

右二味先秤銅銚勛兩訖內蜜復秤知數次內薑汁以微火煎令薑汁盡惟有蜜斤兩乃止旦服如棗大含一丸日三服禁一切雜食

衍義

蜜取甘潤薑取辛散辛甘合劑專破痰結但火逆咽痛非其所宜

治久嗽不瘥方

兔屎 四十
九枚

礪砂 二分

胡桐津 一分

右三味爲末蜜丸如梧子大每服三丸以粥飲下
日三服吐令物盡卽瘥

衍義

兔屎爲目科消翳要藥故千金取治肺中宿滯得礪砂之攻堅破積梧桐津之搜滌痰垢爲形濁氣穢久嗽之峻藥但梧桐津世鮮收取乃桐花開時飄忽沾衣污不可滌者是專取濁惡之物以攻濁惡之垢也吾觀閩人用桐皮漬水沫髮則不染塵垢用皮代津未爲不可礪砂善爛金銀礪砂能柔五金無礪砂之毒劣以之代用亦無不可

紫苑丸 治積年欬嗽喉中呀聲一發不得坐臥

方

紫苑

貝母

半夏

桑白皮

百部

射干

五味子各五分

皂莢

乾薑

欵冬花

細辛

橘皮

鬼督郵各四分

白石英

杏仁各八分

蜈蚣三枚

右十六味為末蜜和丸如梧子大飲服十九日再服稍加至二十九崔氏無半夏射干乾薑橘皮鬼督郵細辛白石英有麻黃二兩荒根白皮一兩半以煮棗湯送下

衍義

久嗽積年不愈必有宿垢留伏於中呀聲一發則伏火內動所以坐臥不安故用皂莢射干督郵之屬辟除惡毒兼石英薑辛助力祛邪紫苑欵冬等味助供佐使之用耳

欵冬丸 治三十年上氣欵嗽唾膿血喘息不得

臥方

欵冬花

乾薑

蜀椒

吳茱萸

桂心

菖蒲

人參

細辛

蕘花各五分

紫苑

甘艸

桔梗

防風

芫花

茯苓

皂莢

各三分

右十六味為末蜜丸如梧子大酒服三九日三

衍義

前方專辟痰垢此方兼散滯血滯血未有不兼痰垢者所以仍用皂莢滌垢薑辛破結更須薤花利水桂心散滯人參茯苓甘艸扶助胃氣以振祛邪之力餘皆疎風治嗽之常味也

又方

欵冬花

紫苑

細辛

蜀椒

桂心

菖蒲

人參

甘艸

防風

石斛

芎藭

當歸

藁本

白朮

半夏

天雄

鍾乳

麻黃

各三兩

獨活

二兩

烏頭

附子

芫花

各一兩

桃仁

二十枚

大棗

二十枚

右二十四味為末蜜丸如梧子大酒服二十九日二服不知加之酒漬服亦得

衍義

此以麻黃附子細辛湯破除陰邪為主而兼白朮鍾乳雄烏半夏芫花甘艸激諸味振發辛烈之性

加以散血祛風破結利竅更濟以人參大力無堅不克但當諒其人元氣能任與否庶幾無誤治之失

又方

欵冬花

紫苑

乾薑

桂心各三分

細辛二分

杏仁

皂莢

礬石

菖蒲

烏頭各一分

川椒五合

吳茱萸六合

右十二味為末蜜丸如梧子大酒服五丸日三夜一二十年嗽不過五十日愈患欵嗽喉鳴上氣服

一劑永瘥

衍義

礬石治腹中堅癖之峻藥兼用皂莢滌除痰垢濟以烏椒薑辛桂萸菖杏辛烈利竅等味得欵冬紫苑引入肺經共襄迅掃之功自紫苑丸至此四方首主宿垢次兼滯血三破陰邪此攻堅癖皆蕩練臟腑之劑不可與尋常治嗽等論也

治肺傷咳唾膿血腸澀背痛不能食惡風目暗眩

眩足脛寒冷方

白膠

生薑各五兩

桂心

人參

紫苑各二兩

地黃切半升

桑白皮切二升

川芎

大麻仁

飴糖各一升

大麥三升

大棗二十枚

右十二味咬咀以水一斗五升煮麥取一斗去麥內藥煮取三升分五服

〔義衍〕

白膠乃楓香脂其性疎通善於開發肺氣故取以治欬唾膿血川芎地黃得桂心和榮之力紫苑散結之功可無委積頓湧之虞且人參助氣於上麻仁滋化於下桑皮瀉肺氣之滿大麥降肝氣之逆大棗飴糖滋腸胃之津氣也

五味子湯 治唾中有膿血牽胸脇痛方

五味子

桔梗

紫苑

甘艸

川斷各二兩

桑皮

地黃各五兩

竹茹三兩

赤小豆一升

右九味咬咀以水九升煮取一升七合分三服

〔義衍〕

此火乘於肺所以唾中有膿血而胸脇牽痛乃血不榮筋之故故用五味紫苑滋培津血桔梗桑皮疎泄肺氣竹茹小豆清膈上火生地逐傷中血川斷通行經絡甘艸平調中氣不獨為火乘肺氣之專藥并可為熱傷肺痿之神丹
竹皮湯 治欬逆下血不息方

生竹皮二兩

紫苑二兩

飴糖一斤

· 生地升切一

右四味咬咀以水六升煮取三升去滓分三服

衍義

欬逆下血而用竹茹清胃紫苑和血飴糖滋津地黃逐血然必不經火焙之鮮者方有散血之功若止血之用必明標乾地黃矣設無鮮者不妨以乾者酒浸或稍加桂心熱因熱用要在臨時權變可也

百部丸 治諸嗽不得氣息唾膿血方

百部根三兩

升麻半兩

桂心

五味子

甘艸

乾薑

紫苑各一兩

右七味為末蜜丸如梧子大每服三九日三以知為度

衍義

嗽不得息明是火逆為患故用百部導之於下升麻散之於上薑桂之辛以散火五味之酸以斂津紫苑甘艸既能治嗽并可和血

治上氣欬嗽喘息喉中有物唾血方

· 生薑汁

杏仁各二升

猪膏二合

蜜

飴糖各一升

右五味先以猪膏煎杏仁色黄出之以纸拭令盡
搗如膏合薑汁糖蜜等合煎令可丸每服如杏核
大一枚日夜六七服漸漸增加之

衍義喉中氣結似乎有物故薑汁杏仁開發肺氣飴糖
蜂蜜猪脂并滋津血然惟大便實者為宜

治一切肺病欬嗽膿血及唾血不止方

好酥三十斤三遍煉停取凝當出醍醐服一合
日三服瘥止一切藥皆不出此神方

又方

三煉酥如雞子黃適寒温灌鼻中日二夜一

衍義肺欬而用醍醐以滋津血之燥乃治無痰乾欬之

的方 一法用乳酥烱化灌鼻孔以鼻為肺竅也

鍾乳七星散 一名吸散 治寒冷欬嗽上氣胸滿唾膿

血方

鍾乳

礬石

欬冬花

桂心 等分

右四味治下篩作如大豆七聚七星形以小筒吸
取酒送下先食服日三不止加之數試大驗又云
臨臥吸服之

又方

鍾乳

細辛

欵冬花

天雄

紫苑

石膏等分

右六味治下篩取如大豆七聚如前法吸之日二
只得食粥七日嗽愈乃止若大豆聚不知小益之
勿太多

七星散 治三十年欵嗽方

欵冬花

紫苑

桑白皮

代赭

細辛

伏龍肝各一兩

右六味治下篩作七星聚如菟豆者以竹筒口當
藥上一一吸咽之令藥入腹中先食日三丸凡服

四日日復作七星聚以一臍肉炙令熟以展轉藥
聚上令藥悉徧肉上仰臥咀嚼細細咽汁令藥力
歆歆割割然毒氣入咽中藥力盡總咽却取瘥止

衍義

七星之名聚其聚形以示靈驗之意方用鍾乳温

肺為主礬石滌痰欵冬下氣桂心散結利關節也
又方除去礬石桂心易入石膏佐鍾乳為去熱之
嚮導天雄烈勝桂心佐鍾乳以破結積之氣紫苑
佐欵冬以通肺氣細辛專利關竅也又以代赭之
重以鎮逆氣佐伏龍肝之暖以散滯血其餘欵冬
紫苑桑皮細辛雖治嗽常品專藉血肉同氣之物

以爲內應獨不用豕肉者以其能助痰內動風氣
且又七星所禁也

治嗽熏法

以熟艾薄薄布紙上紙廣四寸後以薰黃末薄
布艾上務令調勻以荻一枚如紙長捲之作十
枚先以火燒纏下去荻煙從孔出口吸煙咽之
取吐止明日復熏之如前日一二止自然可瘥
得食白粥餘皆忌

又方

薰黃一兩研令細以蠟紙并上薰黃相入調勻

捲之如前法熏之亦如上法日一二止以吐爲
度七日將息後以羊肉羹補之

又方

藍青布廣四寸上布艾艾上布青礬末礬上布
少薰黃末又布少鹽又布少豉末急捲之燒令
著內燥罐中以紙蒙頭便作一小孔吸取煙細
細咽之以吐爲度若心胸悶時略歇烟盡止日
一二度用三捲不盡瘥三七日慎油膩

衍義

三法總爲頑痰固結藥所不應者設若有沉寒則
兼熟艾有毒熱則兼蜂蜜有積垢則兼青礬及鹽

豉等味咸取熏黃取吐以辟歹毒惡氣也
論曰凡上氣多有服吐藥得瘥者亦有鍼灸得除者
宜深體悟之

灸法

嗽灸兩乳下黑白際各百壯即瘥 又以蒲當乳頭
周匝圍身令前後正平當脊骨解中灸十壯 又以
繩橫量口中折繩從脊灸繩兩頭邊各八十壯三報
三日畢兩邊者是口合度 灸從大椎數下行第五
節下六節上穴在中間即神道穴隨年壯并主上氣灸手
屈臂中橫文外骨捻頭得痛處十四壯 上氣欬嗽

短氣氣滿食不下灸肺募五十壯 上氣欬逆短氣
風勞百病灸肩井二百壯 上氣短氣欬逆胸背痛
灸風門熱府百壯 上氣欬逆胸滿短氣牽背痛灸
巨關期門各五十壯 上氣胸滿欬逆短氣灸雲門
五十壯 上氣欬逆胸痺背痛灸胸膺百壯不鍼
上氣欬逆短氣灸臙中五十壯 上氣氣閉欬逆咽
冷聲破喉猜灸天瞿五十壯一名天突
逆氣虛勞寒損憂恚筋骨攣痛心中欬逆泄症腹滿
喉痺頸項強腸痔痔血陰急鼻衄骨痛大小便澀鼻
中乾煩滿狂走易氣凡二十病皆灸絕骨五十壯穴

千金方卷之六
在內踝二三寸宛宛中

·痰飲第六 論一首 灸法一首 方四十首

論曰夫飲有四何謂師曰有痰飲有懸飲有溢飲有支飲問曰四飲之證何以爲異師曰其人素盛今瘦水走腸間漑漑有聲謂之痰飲飲後水流在脇下欬唾引痛謂之懸飲飲水過多水行歸於四肢當汗出而汗不出身體疼重謂之溢飲其人欬逆倚息短氣不得臥其形如腫謂之支飲

凡心下有水者築築而悸短氣而恐其人眩而顛先寒卽爲虛先熱卽爲實故水在於心其人心下堅築築短氣惡水而不欲飲水在於肺其人吐涎沫欲飲水水在於脾其人少氣身體盡重水在於肝脇下支滿噎而痛水在於腎心下悸

夫病人卒飲水多必暴喘滿凡食少飲多水停心下甚者則悸微者短氣脈雙弦者寒也皆大下後喜虛耳脈偏弦者飲也肺飲不弦但喜喘短氣支飲亦喘而不能眠加短氣其脈平也留飲形不發作無熱脈微煩滿不能食脈沉滑者留飲病病有留飲者脇下痛引缺盆噉轉甚其人欬而不得臥引項上痛欬者如小兒掣癎狀夫胸中有留飲其人短氣而渴四肢

歷節痛其脈沉者有留飲也心下有留飲其人背寒冷大如手病人肩息上引此皆有溢飲在胸中久者缺盆滿馬刀腫有劇時此為氣飲所致也膈上之病滿喘欬吐發則寒熱背痛惡寒自泣自出其人振振身瞤劇必有伏飲病人一臂不隨時復轉移在一臂其脈沉細此非風也必有飲在上焦其脈虛者為微勞榮衛氣不周故也冬自瘥一本久作久自瘥病痰飲者當用溫藥和之

小半夏湯 病心腹虛冷遊痰氣上胸脇滿不下食嘔逆者方

半夏 一升

生薑 一斤

橘皮 四兩

右三味咬咀以水一斗煮取三升分三服 若心中急及心痛內桂心四兩 若腹滿痛內當歸三兩羸弱及老人尤宜服之 一方用人參二兩仲景

無橘皮人參

衍義 金匱小半夏湯治支飲不渴更合嘔吐噦中橘皮湯專取辛溫散結之味以治心腹虛冷等證總以溫理中氣為主若心中急痛寒熱糾結加桂心以散之血虛不能以統血脹滿腹痛加當歸以和之羸弱不能自主則加人參以補之此金匱法外法

也

又方

半夏 一升

生薑 一斤

桂心 三兩

甘艸 一兩

右四味咬咀以水七升煮取二升半分三服

衍義

小半夏湯金匱本方只薑半二味今加桂心之散兼甘艸之緩即苓桂朮甘湯之變法

甘艸湯 治心下痰飲胸脇支滿目眩方

甘艸 二兩

桂心

白朮 各三兩

茯苓 四兩

右四味咬咀以水六升宿漬煮取三升去滓服一

升日三小便當利

衍義

金匱本名苓桂朮甘湯此名甘艸湯傷寒門中又名茯苓湯衍義見前十一卷中茯苓湯下

十棗湯 治病懸飲者若下後不可與也凡上氣

汗出而欬者此懸飲也

方見本卷 欬嗽篇中

小青龍湯 病溢飲者當發其汗范汪用大青龍

湯

方見本卷 欬嗽篇中

木防己湯 治膈間有支飲其人喘滿心下痞堅

面色黧黑其脈沉緊得之數十日醫吐下之不

愈者用此方

木防己 三兩

桂心 二兩

人參 四兩

石膏 雞子大十二枚

右四味咬咀以水六升煮取二升分二服虛者即愈實者三日復發發則復與若不愈去石膏加茯苓四兩芫硝三合微下利即愈 一方不加茯苓

衍義

趙以德註金匱方曰支飲在膈間氣血皆不通利氣不利則與水同逆於肺而發喘滿血不利則與水雜揉結於心下而為痞堅腎氣上應水飲腎水之色黑血凝之色亦黑故鰲之色見於面也脈沉

為水緊為寒兆別有寒邪即水氣之寒也醫雖以吐下之法治然藥不切於病故不愈用木防己以散留飲結氣石膏主心肺逆氣人參助胃祛水桂心和榮開結且支飲得溫則行若邪客之淺在氣分多而虛者服之即愈若邪客之深在血分多而實者則愈後必再發以石膏為氣分之藥故去之芫硝為血分藥能治痰奕堅茯苓伐腎利水而為芫硝之佐故加之

厚朴大黃湯 夫酒客欬者必致吐血此坐久飲過度所致其脈虛者必胸滿胸中本有支飲此

方主之

厚朴 一尺

大黃 六兩

枳實 四兩

右三味咬咀以水五升煮取二升溫分二服

衍義

此即小承氣湯以大黃多遂名厚朴大黃湯若厚朴多即名厚朴三物湯此支飲胸滿必緣其人素

多濕熱濁飲上逆所致故用蕩滌中焦藥治之

支飲不得息葶藶大棗瀉肺湯治之 方見十七卷肺癰篇中

嘔家不渴渴為欲解今反不渴心下有支飲故也小

半夏湯主之又有先渴即嘔者此為水停心下小半

夏加茯苓湯主之

小半夏加茯苓湯 治卒嘔吐心下痞膈間有水

目眩悸方

半夏 一升

生薑 半斤

茯苓 三兩

右三味咬咀以水七升煮取一升五合去滓溫分

再服 胡洽不用茯苓用桂心四兩

衍義

嘔家有痰嘔盡痰去而渴者為欲解與傷寒之服小青龍湯已渴者寒去欲解同義今反不渴是積

飲尚留去之未盡故用半夏散結勝濕生薑散氣

止嘔千金更加茯苓佐之與治卒嘔吐心下痞膈

間有水眩悸同法

五苓散 假令瘦人臍下有悸者吐涎沫而顛眩
水也此方主之 方見前九卷傷寒上

椒目丸 治腹滿口乾燥此腸間有水氣此方主
之

椒目

木防已

大黃 各一兩

葶藶 二兩

右四味為末蜜丸如梧子大先食飲服一九日三
後稍增口中有津液止渴者加芫硝半兩

衍義 金匱名已椒黃歷黃丸水積腸間則肺氣不宣臍
鬱成熟而腹滿津液遂不上行而口舌乾燥用木

防已椒目葶藶利水散結而葶藶尤能利腸然腸
胃所受水穀之氣邪實腹滿非輕劑所能治必加
大黃以瀉之若口中有津液則水去津回可勿藥
矣若仍作渴者此痰飲聚於血分必加芫硝以祛
逐之

甘遂半夏湯 病者脈伏其人欲自利利者反快
雖利心下續堅滿此為畱飲欲去故也此方主

之

甘遂 大者三枚

半夏 十二枚以水一升煮取半升

芍藥 三枚

甘艸 一枚如指大以水一升煮取半升

右四味以蜜半升內二藥汁合一升半煎取八合頓服之

衍義 留飲堵塞竅隊胃氣不得轉輸故脈伏不顯若留飲既下胃氣受傷必欲自利自利而反快者中焦所塞暫通也通而復積故續堅滿必更用藥盡逐之然欲直達其積飲莫若甘遂快利用之為君欲和脾胃除心下堅又必以半夏佐之然芍藥停濕何留飲用之甘艸與甘遂相反何一方並用蓋甘艸緩甘遂之性使不急速徘徊逐其所留芍藥木鬱土中成堅滿又佐半夏以和胃消堅也

大茯苓湯 主胸中結痰飲滯臍下弦滿嘔逆不得食亦主風水方

茯苓

白朮

各三兩

半夏

桂心

細辛

一作人參

生薑

各四兩

橘皮

附子

當歸

各二兩

右九味咬咀以水一斗煮取三升去滓分三服服三劑良

衍義 水飲結於臍下雖有桂苓不得生附不能破除陰分之水癖雖有薑半不得生朮不能祛滌胸中之痰氣橘皮者茯苓之佐細辛者附子之佐當歸者

桂心之佐也

茯苓湯 治胸膈痰滿方

茯苓 四兩

半夏 一升

生薑 一斤

桂心 八兩

右四味咬咀以水八升煮取二升半分四服冷極者加大附子四兩若氣滿者加檳榔三七枚

衍義

痰氣聚於胸中故用小半夏加茯苓湯不得桂心之辛散難以逞破的之功冷極加附子是指真陽虛者而言氣滿加檳榔是指痰氣盛者而言非謂二味可以並入一方也 胃腑嘔吐門中名半夏

湯藥味雖同而分兩不類故兩存之

大半夏湯 治冷痰飲滯胸膈中不理方

半夏 一升

白朮 三兩

茯苓

人參

甘艸

桂心

附子 各二兩

生薑 八兩

右八味咬咀以水八升煮取三升分三服

衍義

金匱大半夏湯但用半夏人參甘艸三味水蜜和煎以治胃反嘔吐此用參附朮附桂附合苓桂朮甘湯仍用金匱三味以治冷痰飲滯故不用水蜜和煎而用生薑以滌痰氣也

半夏湯 治痰飲滯氣吞酸方

半夏

吳茱萸

各三兩

生薑

六兩

附子 一枚

右四味以水五升煮取二升半分三服老少各半

日三

衍義

前方以中氣不運冷痰留積故用參朮佐半夏附子此以曲直作酸故用吳萸通達肝氣以佐半夏附子仍用生薑開豁痰滯也

乾棗湯 治腫及支滿滯飲方

大棗 十枚

大戟

大黃

甘艸

甘遂

各二兩

黃芩

一兩

芫花

薤花

各半兩

右八味咬咀以水五升煮取一升六合分四服空

心服以快下為度

衍義

此即十棗湯加用甘艸之相反激發大戟芫花逐飲之性更加薤花以佐芫花之破積大黃黃芩以佐大戟而攻懸飲堅滯也

當歸湯 治留飲宿食不消腹中積聚轉下方

當歸

人參

桂心

黃芩

芍藥

甘艸

芒硝 各二兩

大黃 四兩

澤瀉

生薑 各三兩

右十味咬咀以水一斗煮取三升分三服

衍義

中氣式微不能輸運而致癖積留著水道不利故用參甘歸芍平調血氣硝黃薑桂攻理痰積黃芩澤瀉分利支河水道而通蘊阻之熱也

治痰飲飲食不消乾嘔方

人參

旋覆花

橘皮

細辛 各一兩

澤瀉

白朮

杏仁

枳實 各二兩

茯苓

半夏

生薑

柴胡

芍藥 各三兩

右十三味咬咀以水九升煮取二升七合分三服

日二服

衍義

痰氣阻逆於中非開提於上不能開痰進食降濁升清故用旋復花杏仁疎泄肺氣半夏枳實開豁痰氣人參白朮健運中氣柴胡芍藥調和肝氣細辛橘皮開發滯氣茯苓澤瀉通調水氣使肺氣降而胃氣升肝氣平而穀氣運濁氣散而正氣安矣治胸中痰飲腸中水鳴食不消嘔吐水方

檳榔 十二枚

生薑

杏仁

柑皮 各四兩

半夏 八兩

茯苓 五兩

橘皮 三兩

右七味咬咀以水一斗煮取三升去滓分三服

衍義

杏仁開拓胸中之氣薑半消豁膈上之痰檳榔茯苓泄利腸中之水柑橘二皮一寒一溫升降上下

諸氣此惟病氣未固元氣未漓者宜之

吳茱萸湯 治胸中積冷心嘈煩滿汪洋不下飲

食心胸應背痛方

吳茱萸 三兩

半夏 四兩

人參

桂心 各二兩

甘艸 一兩

生薑 五兩

大棗 二十枚

右七味咬咀以水九升煮三升去滓分三服日三

衍義

本氣虛寒之人胸中寒熱飲滯積所以汪洋飲食

艱於消尅蘊積而從火化所以嘈煩榮氣不能充

於陽位所以背痛故用萸桂通陽薑半滌飲人參

甘艸扶胃進食大棗運行脾津乃大小半夏湯之

發源也

治胸膈心腹中痰水冷氣心下汪洋嘈煩或水鳴

多唾口中清水自出脇肋急脹痛不能飲食此

皆胃氣弱受冷故也其脈來沉弦細遲悉主之方

半夏

生薑 各五兩

芍藥 三兩

茯苓 四兩

旋復花

細辛

橘皮

桂心

人參

甘艸

桔梗 各二兩

右十一味咬咀以水一斗煮取三升分三服病先有時水下者用白朮三兩去旋復若欲得利者加大黃二兩須微調者用乾地黄

衍義此亦大小半夏之發源彼以胸痛引背故用吳萸

此以脇急脹痛故用桂心又以口出清水故用旋復細辛橘皮桔梗治冷涎泛芍藥佐桂心以治脇急茯苓佐人參以扶胃弱治冷熱久澀實不能飲食心下虛滿如水狀方

前胡

半夏

茯苓

生薑 各四兩

枳實

白朮

甘艸 各三兩

桂心 二兩

右八味咬咀以水八升煮取三升分三服

衍義苓桂朮甘湯滌除痰飲之專藥更合之以小半夏湯茯苓湯枳朮湯但加前胡以下氣也

前胡湯 治胸中久寒滯實膈塞胸痛氣不通利
三焦冷熱不調飲食減少無味或寒熱身重臥
不欲起方

前胡

人參

當歸

半夏

甘艸

大黃

防風

麥冬

吳萸

黃芩

生薑

杏仁

右十二味咬咀以水一斗煮取三升去滓分三服

深師方云若脇下滿加大棗十二枚此利水亦佳

義衍

膈胸塞痛良由冷熱不調故方中寒熱兼濟補瀉

互投而加下氣滌痰之味

旋復花湯 治胸膈痰結唾如膠不下食者方

旋復花

細辛

前胡

茯苓

甘艸

生薑

桂心

半夏

烏頭

右九味咬咀以水九升煮取三升去滓分三服

義衍

此以小半夏加茯苓湯滌痰劑中加旋復前胡烏

頭桂心細辛甘艸以祛風毒然惟上熱咽乾下元

虛冷者為之合劑若熱邪固結誤投禍不旋踵不

可不慎

薑椒湯 治胸中積聚痰飲飲食減少胃氣不足

欬逆嘔吐方

薑汁 七合

川椒 三合

桂心

附子

甘艸 各一兩

橘皮

桔梗

茯苓 各二兩

半夏 三兩

右九味咬咀以水九升煮取二升半去滓內薑汁煮取二升分三服服三劑止若欲服大散諸五石丸必先服此湯及進黃芪丸佳 一方不用甘艸川椒桂附入於二陳湯中但加桔梗舟楫之劑載諸藥以破胸中冷積寒痰也

薑附湯 治痰冷澀氣嘔沫胸滿短氣頭痛飲食

不消化方

生薑 八兩

附子 四兩生用破四

右二味咬咀以水八升煮取二升分四服亦主卒

風

衍義於前方中但取薑汁附子二味辟除冷癖校之前方其力倍專乃乾薑附子湯之變法彼取溫中故用乾薑此取滌痰故用薑汁兩不移易之定法

擦膈散

治心上結痰飲實寒冷心悶方

瓜蒂 二十枚

赤小豆 二十七枚

人參

甘艸 各一分

右四味治下篩為末酒服方寸七日二亦治諸黃
擦膈者撩動膈上痰飲使之上涌也方用人參甘
艸入於瓜蒂散中使人參助其上涌之力一舉而
傾囊盡出也

斷膈湯 治胸中痰澀方

恒山 三兩 甘艸 松蘿 各一兩

瓜蒂 二十枚

右四味咬咀以水酒各一升半煮取一升半分三
服後漸減之得快吐後須服半夏 方見本卷前篇

術義

斷膈者斷除膈上痰澀也瓜蒂吐膈中寒實加以
恒山涌膈上調痰松蘿乃松上女蘿氣清味苦能
吐肝膽風痰與赤小豆之涌吐心包熱痰似同而
異吐後服半夏湯以實中土緣恒山瓜蒂皆傷伐
胃氣也

松蘿湯 治胸中痰積熱皆除方

松蘿 二兩 烏梅 梔子 各十枚

恒山 甘艸 各三兩

右五味咬咀以酒三升浸一宿平旦以水三升煮
取一升半去滓頓服之亦可分二服一服得快吐

卽止

義衍

松蘿湯中不用瓜蒂而用梔子以吐肺胃熱痰卽用烏梅以收斂津液與吐後用半夏湯一意

杜蘅湯 治吐百病方

杜蘅

松蘿 各三兩

瓜蒂 二七枚

右三味咬咀以水一升二合漬二宿去滓分二服若一服卽吐者止未吐者更服相去如人行十里久令藥力盡服稀糜一升卽定老小用之亦佳

義衍

杜蘅下氣消痰以其氣濁故用以助瓜蒂松蘿之涌吐

蜜煎 治寒熱方

蜜 五合

恒山

甘艸 各二兩一方用半兩

右三味取二味咬咀以水一斗煮取二升去滓內蜜溫服七合吐卽止不吐更服七合勿與冷水又方

蜜 六合

醋 八合

右二味調和平旦頓服須臾猥猥然欲吐摘之若意中不盡明旦更服無不大嘔安穩

義衍

蜜煎恒山兼甘艸之甘緩與蜜同為戀膈之品專取緩搜膈上之痰也 又方以蜜醋多服須臾兀

兀欲吐乘勢以指摘吐之以無瓜蒂恒山等傷胃之藥故云安穩

治卒頭痛如破非中冷又非中風其痛是胸膈中痰厥氣上衝所致名為厥頭痛吐之即瘥方單煮茗作飲二三升許適冷暖飲二升須臾摘令吐吐畢又飲如此數過劇者須吐膽汁乃止不損人而渴則瘥

衍義茗味苦能達清淨之腑多飲數吐則嘔膽汁亦不損人

葱白湯 治冷熱膈脹發時頭痛悶亂欲吐不得

者方

葱白 二七莖

桃葉 一握一作枇杷葉 珍珠

恒山

烏頭

甘艸 各半兩

右六味咬咀以酒水各四升和煮取三升去滓內珠末每服一升吐即止

衍義葱白烏頭能吐風痰然須恒山佐之甘艸和之葱

白桃葉引之珍珠取以安神解毒此為安榮人安心而用也自撩膈散至此八方總皆一系變法

大五飲丸 主五種飲一日畱飲水停在心下二

日澣飲水澣在兩脇下三日痰飲水在胃中四

曰溢飲水溢在膈上五臟間五日流飲水在腸
間動搖有聲夫五飲者由飲酒後及傷寒飲冷
水過多所致方

菴蓉

遠志

苦參

藜蘆

烏賊骨

白朮

甘遂

大黃

石膏

栝蒌根

桔梗

半夏

紫苑

前胡

五味子

芑硝

桂心

芫花

大戟

葶藶

黃芩

貝母

人參

茯苓

當歸

芍藥各三兩

甘艸

恒山

山藥

厚朴

細辛

附子各三分

巴豆三十枚

右三十三味治下節蜜和丸如梧子大飲服三丸

日三稍稍加以知為度

術義

金匱有四飲之名千金有五飲之治其法則一師

曰其人素盛今瘦水走腸間漉漉有聲謂之痰飲

飲後水流在脇下欬唾引痛謂之懸飲千金謂之

澼飲三日飲水流行歸於四肢當汗出而不汗出

身體疼重謂之溢飲四曰欬逆倚息短氣不得臥其形如腫謂之支飲千金謂之流飲四飲之外又有留飲留飲伏在心下則背惡寒留於脇下則痛引缺盆平時則短氣而渴四肢歷節痛發則喘滿吐逆寒熱背痛腰疼目泣自出劇則振振身瞶謂之伏飲伏飲即留飲之伏而不動者千金合而言之則爲五飲而四飲之中支飲爲最劇其留伏之飲則心脇四肢中外皆病兼有四者之患所以千金首列留飲夫病人飲水多必暴喘滿食少飲多水停心下微者短氣甚者則悸悸則水在腎也若

心下堅築短氣惡水不欲飲水在心也吐涎沫欲飲水水在肺也少氣身重水在脾也脇下支滿噎而痛水在肝也此槩言五飲致病五臟見證之大端金匱分隸而治千金兼該而行大旨水飲爲陰類緣其人內乏真陽雖有濕熱但蘊爲粘韌不能稠厚所以五飲丸中必需辛溫益氣以鼓諸藥之力如人參白朮附子桂心助陽藥也藜蘆恒山涌吐藥也大戟芫花甘遂葶藶破水藥也大黃芫硝攻下藥也半夏巴豆滌痰藥也巴豆不獨滌痰兼能涌吐所以白散用之吐中便具發散之義使驅

穀之水從皮腠而泄也其用甘艸人參芍藥專取相反之味以激大戟芫花甘遂藜蘆攻伐之力因方中攻伐之劑過多恐其津隨飲脫是以菴蓉薯蕷五味茯苓之屬又為必需其餘諸藥或相扶正或佐去邪總不出五種諸法以為五飲通治也

旋復花丸 治停痰滯飲結在兩脇腹脹滿羸瘦不能食食不消化喜唾乾嘔大小便或澇或利腹中搖動作水聲腹內熱口乾好飲水漿卒起頭眩欲倒脇下痛方

旋復花 桂心 枳實

人參 各五分 甘遂 三分 吳茱萸

細辛 大黃 黃芩

葶藶 厚朴 芫花

橘皮 各四分 乾薑 芍藥

白木 各六分 茯苓 狼毒

烏頭 礬石 各八分

右二十味為末蜜丸如梧子大酒服五九日二後

加以知為度 延年方無白木狼毒烏頭礬石細辛黃芩厚朴吳茱萸芫花橘皮甘遂有

皂莢附子各二分蜀椒杏仁防葵各三分地黃四分

衍義 痰癖結聚腹脇喜唾乾嘔眩暈欲倒故用旋復花

開結下氣行水消痰開發肺與大腸水氣之味爲
主其間參朮桂心芫花甘遂葶藶大黃等與五飲
丸相同者十餘味更加烏頭乾薑狼毒礬石其破
積散滯之力不減五飲丸中大戟巴豆之烈也

中軍候黑丸

治滯飲停結滿悶目暗方

芫花 三兩

巴豆 八分

杏仁 五分

桂心

桔梗 各四分

右五味爲末蜜丸如胡豆每服三丸稍增得快下
止

衍義

黑丸之名專取杏仁熬黑以滌胸中宿垢與巴豆

破積不殊并取芫花利水桂心散血桔梗上通肺
氣下走大腸所以水腫先從頭面至足頭眩身熱
亦取用之本經治腹滿腸鳴幽幽豈非下走大腸
之一驗乎

順流紫丸

治心腹積聚兩脇脹滿畱飲痰滯大

小便不利小腹切痛膈上塞方

石膏 五分

桂心 四分

巴豆 七枚

代赭

烏賊骨

半夏 各三分

右六味爲末蜜丸如胡豆平旦服一九加至二九

胡洽有藜蘆菴蓉當歸各三分范汪方無石膏半
夏有當歸一分菴蓉二分茯苓三分藜蘆五分

衍義

紫丸專取代赭煨赤以鎮心下痰澀配以石膏之寒而化心下結熱并取半夏滌除痰飲烏賊清理乾血桂心分解痰血巴豆上涌冷涎下破寒積服此則痰水順流而下故以名方

治停痰澀飲結在兩脇腹滿羸瘦不能飲食食不消喜唾乾嘔大小便或澀或利方

- | | | |
|-----|----|-----------------------|
| 旋復花 | 大黃 | 附子 |
| 茯苓 | 椒目 | 桂心 |
| 芫花 | 狼毒 | 乾薑 |
| 芍藥 | 枳實 | 細辛 <small>各八分</small> |

右十二味為末蜜丸如梧子大飲下三九日三服後漸增

衍義

金匱大黃附子湯治脇下偏痛發熱以虛寒從下而上故用大黃附子溫藥下之細辛治陰邪上逆之發熱此治停痰澀飲故加狼毒芫花枳實以佐大黃之蕩澀乾薑桂心茯苓以佐附子之破結旋復椒目芍藥以佐細辛散熱也

治風氣膈上痰飲方
用不開口苦瓠一枚湯煮三五沸以物裹熨心

膈上

衍義苦瓠大苦大寒大傷胃氣用以湯煮熨臍者取其
引領濁惡之氣從皮毛泄也

治結積留飲滯囊胸滿飲食不消方

灸通谷五十壯

九蟲第七

論三首

方四十五首

論曰人腹中有尸蟲此物與人俱生而爲人大害尸
蟲之形狀似大馬尾或如薄筋依脾而居有頭尾長
三寸又有九蟲一曰伏蟲長四分二曰虻蟲長一尺
三曰白蟲長一寸四曰肉蟲狀如爛杏五曰肺蟲狀
如蠶六曰胃蟲狀如蝦蟆七曰弱蟲狀如瓜瓣八曰

赤蟲狀如生肉九曰蟻蟲至細微形如菜蟲狀伏蟲
則羣蟲之主也虻蟲貫心則殺人白蟲相生子孫轉
多其母轉大至長四五寸亦能殺人肉蟲令人煩滿
肺蟲令人欬嗽胃蟲令人嘔吐胃逆喜噦弱蟲又名
膈蟲令人多唾赤蟲令人腸鳴蟻蟲居胴腸之間多
則爲痔劇則爲癩因人瘡痍則生諸癰疽癰瘦癩疥
齧蟲無所不爲人亦不必盡有有亦不必盡多或偏
有或偏無類婦人常多其蟲凶惡人之極患也常以
白筴艸沐浴浴佳根葉皆可用旣是香艸且是尸蟲所
畏也

論曰凡欲服補藥及治諸病須去諸蟲并痰飲宿滯醒醒除盡方可服補藥不爾必不得藥力

治肝勞生長蟲在肝為病恐畏腹中不安方

蠟

吳茱萸東行根皮各三兩

乾榛四兩

雞子五枚去黃

粳米粉半斤

右五味搗吳茱萸皮為末和藥銅器中煎可丸如

小豆大宿勿食平日飲服一百丸小兒服五十丸

蟲當爛出集驗方無吳茱萸根名雞子丸

衍義諸蟲皆從濕熱生化濕熱之治莫善於風藥然蟲

蟻之濕皆屬內因內因之濕仍須治內風之藥方

可直達病情如肝勞生長蟲則用蜂蠟至淡之味以散濕熱之病吳茱萸根走肝取東南走巽位者以通風氣而治內風乾漆殺蟲然非穀肉之味投其所喜不能引入其口使之爛出也

治心勞熱傷心有長蟲名曰蠱長一尺貫心為病

方

雷丸

橘皮

桃仁一作桃皮

石蠶各五分

狼牙六分

貫衆二枚

僵蠶三七枚

蕪荑

青葙

乾漆各四分

亂髮如雞子大燒

吳茱萸根皮七分

右十二味爲末蜜丸如梧子大空腹苦酒下七丸
加至二七九日二服 一方無石蠶

衍義治蟲諸藥如狼牙貫衆蕪夷青葙乾漆吳茱萸根
皆能殺蟲獨雷丸專治心勞生蟲者昔有道士治
楊勛應聲蟲得此而愈以心爲虛靈之藏言者心
之聲故其所生之蟲亦靈慧而能應聲也

治脾勞熱有白蟲在脾中爲病令人好嘔下蟲方

大麻子

八升

東引吳茱萸根

一尺大者

橘皮

二兩

右三味咬咀以水煎臨時量服凡合禁聲勿語道

作藥蟲當聞便不下切忌之

衍義黃根橘皮殺蟲得大麻子引入脾經誘入其口而
殺之

治肺勞熱生蟲在肺爲病方

狼牙

三兩

吳茱萸根白皮

五合

東行桑根白皮

切一升

右三味咬咀以酒七升煮取一升平旦頓服之

衍義狼芽黃根得桑根白皮引入肺經以殺其蟲爲寸
白專藥

治腎勞熱四肢腫急蟻蟲狀如菜蟲在腎中爲病

方

蕪荑

胡粉

槐皮

各一兩

乾漆 二兩

貫衆 三枚

杏仁

四十枚

吳萸 五十枚

右七味治下篩平旦以井花水服方寸匕加至一

七半瘥止

衍義

蕪荑乾漆貫衆吳萸雖皆殺蟲之品得胡粉引入

於腎始能中的從甘艸粉蜜湯中採出

治蟻蟲方

以好鹽末二兩苦酒半升合銅器中煮數沸宿

不食空心頓服之

又方

珍珠 二兩

亂髮 如雞大燒末

右二味治下篩以苦酒調旦起頓服之

肘後方用治三蟲

衍義

鹽醋皆日用之品惟是專用二物之醎酸便有化

蠶之功效 蟲乃血之所化故用髮灰以散滯血

珍珠以散濕熱貴賤所禀不同主治不能無異

麤蕪丸 治少小有虵蟲結在腹中數發腹痛微

下白汁吐悶寒熱飲食不生肌皮肉痿黃四肢

不相勝舉方

蘼蕪

貫衆

雷丸

山茱萸

天冬

狼牙

藿蘆

甘菊

各四分

右八味為末蜜丸如大豆三歲飲服五丸五歲已上以意加之漸至十九丸加藿蘆六分名藿蘆丸治老小及婦人等萬病腹內冷熱不通急滿痛胸膈堅滿手足煩熱上氣不得飲食身體氣腫腰脚不遂腹內狀如水雞鳴女人月經不調無所不治

義本經言蘼蕪辟邪惡除蟲毒取其辛散也貫衆雷丸狼牙藿蘆皆殺蟲之味山茱萸既能治心下邪

氣亦能斂肝腎精血天冬能殺三蟲去伏尸又能強骨髓甘菊能治惡風濕痺蟲乃風濕所化雖無殺蟲之功能散濕熱即蟲失所養必隨諸殺蟲藥而下出矣

治虬蟲方

藿蘆末以飲臛和服方寸匕不覺加之

備急方
治蟻蟲

藿蘆 十分

乾漆

篇竹 各二分

右三味治下篩米飲和一合服之日三

治虬蟲在胃中漸漸羸人方

乾漆外臺作鹽

醇酒

白蜜各一升

右三味內銅器中微火煎令可丸如桃核一枚溫酒中宿勿食旦服之蟲必下未下更服外臺治蟻蟲

又方

取棟實內醇苦酒中浸再宿用綿裹內穀道中入三寸一日易之集驗方用治長蟲

治蟻蟲攻心腹痛方

剉薏苡根二斤以水七升煮取三升先食服之蟲即死出

又方

鶴蝨為末苦酒空腹服方寸七佳

又方

七月七日採蒺藜子陰乾燒灰先食服方寸七日三即瘥

衍義 藿蘆殺蟲借臙引入蟲口 藿蘆走氣分更益以

乾漆破血菡竹殺蟲化濕熱 乾漆殺蟲酒蜜投

蟲所好 苦棟殺蟲浸酒入綿以內穀道專主肛

門之匿 薏苡根逐濕下行能治濕熱生蟲之善

藥 鶴蝨苦寒殺蟲得苦酒之酸收使不逆上然

須用天名精子為真否即是偽 刺蒺藜治惡血

破癥瘕積聚專祛風木之邪能治內濕生蟲之專味

治寸白蟲方

吳茱萸細根一握
熟搗

大麻子三升
熬搗末

右二味以水三升和搗取汁平旦頓服至巳時與好食令飽須臾蟲出不瘥明日更合服之不瘥三日服時后治三蟲以酒漬取汁服

又方

蕪蘼六分

狼牙四分

白蘂二分

右三味治下篩以苦酒二合和一宿次早空腹服

之

又方

胡麻一升

胡粉一兩

右二味為末平旦空腹以猪肉臠汁噉盡即瘥

又方

以榧子四十九枚去皮月上旬平旦空腹服七枚七日服盡蟲消成水永瘥

又方

以吳茱萸北陰根乾去土切一升以酒一升浸一宿平旦分二服凡茱萸皆用細根東引北陰

者良若如指以上大不任用

又方

用石榴根如茱萸法亦可水煮服

又方

麻仁五升搗取汁分五服亦治小兒蚘蟲

又方

以好麻油二升煎令熟內葱白三寸令黑便熟冷頓服之

又方

熬錫令十分燥作末以方寸七內羊肉臠中服

又方

桑根白皮切三升以水七升煮取二升宿勿食平旦空腹頓服之

又方

檳榔二七枚治下篩以水二升半先煮其皮取一升半去滓內末頻服暖臥蟲出或不盡更合服取瘥止宿勿食旦服之

術

黃根走肝麻仁入脾肺故治寸白有效 藤蕪狼牙治蟲猛藥白斂散結止痛能解風氣百疾 胡

麻胡粉皆入於腎隱曲生蟲之專藥 榧子殺肺
中寸白 萸根細者行於經絡以治腠理之蟲
石榴根善透石罅故能治竅隧之蟲 大麻花治
惡風毒血故其仁亦能治風殺蟲 麻油解毒葱
白散風蟲亦風毒所化縱非治蟲之藥實爲治蟲
之用專取其潤而導之使下也 飴糖濕熱之味
雖熬本性猶存羊臙之膻投蟲所喜而爲蠶濕同
氣之治 桑根一味大泄肺氣故能下蟲非湯藥
中配入他藥之比然必生者乃效 檳榔泄胸中
至高之氣破腹中委積之蟲總取獨用以擅專功

論曰凡得傷寒及天行熱病腹中有熱又人食少腸
胃空虛三蟲行作求食蝕人五臟及下部若齒齧無
色舌上盡白甚者脣裏有瘡四肢沉重忽喜眠當
數看其上脣內有瘡唾血脣內如粟瘡者心內懊懣
痛悶此蟲在上蝕其五臟下脣內生瘡者其人喜眠
此蟲在下蝕其下部人不能知可服此蝕蟲藥不爾
蠶蟲殺人又曰凡患濕蠶者多是熱病後或久下不
止或有客熱結在腹中或易水土溫涼氣著多生此
病亦有乾蠶不甚瀉利而下部瘡癢不問乾濕久則
殺人凡濕得冷而苦利單煮黃連及艾葉苦參之屬

皆可用之若病人齒斷無色舌上白者或喜眠煩憤
不知痛癢處或下痢急治下部不曉此者但攻其上
不以上部為意下部生蟲蟲蝕其肛肛爛見五臟便
死燒艾於竹筒熏之

治傷寒蠱病方

取生雞子小頭叩出白入漆灰一合攪令極調
當沫出更內著殼中仰吞之食傾或半日乃吐
下蟲劇者再服蟲盡熱除病愈

衍義傷寒蠱病多由熱傷榮血血結蟲聚令人狐疑昏
惑勢劇難堪者卽以漆灰破血為主調雞子生吞

引入肝經血分

治濕蠱方

黃連 十分

生薑 十分

苦參 四分

艾葉 八分

右四味咬咀以水一斗煮取三升分三服久者服

三劑

衍義蠱乃濕熱蘊化故以黃連苦參苦燥之味療其濕
熱兼取艾之純陽薑之辛散為同氣之內應毋問
何蠱無不宜之

懊懷散

治濕蠱瘡爛殺除蠱方

篇竹 半兩

藿蘆

雷丸

青箱子

女青

桃仁 各三兩

右六味治下篩粥飲服方寸七日三加至二七亦可酒服

衍義懊懺亦是蟲蠶為患故用篇竹藿蘆殺氣分蟲雷

丸青箱子女青桃仁破血蠶也

青箱散 治熱病有蠶下部生瘡方

青箱子 一兩

橘皮

篇竹 各二兩

藿蘆 四兩

甘艸 一分

狼牙 三分

右六味治下篩米飲和每服一合日三不知稍加

之 小品無甘艸

衍義青箱篇竹藿蘆狼牙治蠶專藥橘皮甘艸調和申

氣以行藥力

薑蜜湯 治濕蠶方

生薑汁 五合

白蜜 三合

黃連 三兩

衍義方中一寒一熱分解濕熱借蜜引入蟲口濕熱之
更煎取一升二合五歲兒平日空腹服四合日二
右三味以水二升別煮黃連取一升去滓內薑蜜
蠶無容身之地矣

治蠶蝕下部癢穀道中生瘡方

阿膠

當歸

青箱子

各一兩

艾葉

一把

右四味咬咀以水八升煮取二升半去滓分三服

衍義青箱治蟲艾葉導熱阿膠當歸以和其血

杏仁湯

治蠶方

杏仁

五十枚

苦酒

二升

鹽

一合

右三味和者取五合頓服之小兒以意量之

衍義杏仁上散肺氣下走大腸借酸鹹以收上逆之氣

桃皮湯

治蟻蟲蝨及痔蠶蟲食下部生瘡方

桃皮

艾葉

各一兩

槐子

三兩

大棗

三十枚

右四味咬咀以水三升煮取半升頓服之良

衍義桃根白皮散血殺蟲艾葉溫血導火槐子益腎清

火大棗入脾以通津液

猪膽苦酒湯

治熱病有蠶上下攻移殺人方

猪膽一具苦酒半升和之火煎令沸三上三下

藥成放溫空腹飲三滿口蟲死便愈

衍義蠶本肝家濕熱所化猪膽專治肝膽之熱以苦酒

和之乃猪膽導之變法

治濕病下部有瘡蟲蝨人五臟方

雄黃

皂莢

各一分

麝香

硃砂

各二分

右四味為末蜜和搗萬杵初得病酒服如梧子大一丸日二若下部有瘡取梧子大末內下部日二

行義

雄黃解毒殺蟲皂莢滌飲開痺麝香和榮利竅硃

砂碎邪以安神氣

雄黃兌散治時氣病蠶下部生瘡方

雄黃

半兩

桃仁

一兩

青葙子

黃連

苦參

各三兩

右五味為末綿裹如棗核大內下部亦可棗汁服

方寸七日三

治下部蠶瘡方

青黛

黃連

黃蘗

丁香

各一兩

麝香

二分

右五味治下篩以小棗大內下部中日一度重者棗大和猪脂二三合灌下部中日二度

治下部生瘡方

濃煮桃皮煎如飴取內下部若口中有瘡含之

治濕蠶方

取生薑刮去皮斷理切之極熟研取汁一升半

千金方卷之十一
又以水一升半合和相得平旦空腹服之仍削
生薑二枚如繭大以楸葉桃葉數重裹訖於爐
灰火中燒令極熱內下部中食頃若濕盛者三
旦作頻服無有不瘥

治蟲蝕下部方

胡粉

雄黃

右二味等分為末著穀道中亦治小兒

治病蠶蟲方

燒馬蹄灰作末以猪脂和傅綿繩上內下部中

日五度

治大孔蟲癢方

蒸大棗取膏以水銀捻和長三寸綿裹訖宿內
大孔中明旦蟲皆出水銀損腸宜慎之

治傷寒熱病多睡變成濕蠶四肢煩疼不得食方

羊桃十斤切搗令熟暖湯三斗淹浸之日正午
時入中坐一炊久不過二度瘥

治熱病蝕毒令人喜寐不知痛處面赤如醉下利

膿血當數視其人下部孔稷稷然

一云搜

赤卽

蠶瘡也劇困殺人見人肝肺服藥不瘥可熏之

之方

千金方不義卷之
以泥作小罌令受一升竹筒一枚如指大一頭
橫穿入罌腹中一頭內入穀道中淺入可取熟
艾如雞子大著罌中燃之於罌口吹煙令入人
腹艾盡乃止大人可益艾小兒滅之羸者勿多
多亦害人日再熏不過三作蟲則死永斷亦可
末燒雄黃如此熏之

義衍

下部匿瘡雄黃兌散最捷方中雄黃殺蟲桃仁散
血黃連苦參專解濕熱水連葉青黛散濕熱麝香
達竅隧丁香開導熱邪之去路三桃葉殺蟲下導
上含俱無妨礙 削生薑導以楸葉裹內下部如

無楸葉桃葉亦可代用不必二葉並裹也 胡粉
入腎雄黃入心為殺陰毒匿瘡之專藥 馬蹄散
血辟惡殺蟲亦可應用 水銀為殺蟲猛藥雖和
棗膏見熱本質猶動大能損腸故云宜慎 羊桃
壓丹石毒亦能化蟲匿 艾熏以辟下部陰匿加
雄黃尤效

